

Дуонинг ижобат бўлишига ишониш



15:00 / 23.06.2020 2897

Бир имом жума мавъизасида жамоатга шундай деди: “Азизлар, мана анчадан бери ёмғир ёғмай, экинларимиз қуриш арафасига келиб қолди. Шунинг учун кейинги жумага ҳаммамиз яхшилаб тайёргарлик кўриб келайлик. Ўша куни мавъизадан сўнг Аллоҳ таолодан ёмғир сўраб дуо қиламиз”.

Кейинги жума куни мавъиза қилиб бўлган имом жамоатдан: “Дуо қилиш учун тайёргарлик кўриб келдингларми?” деб сўради.

Ўтирганлар “Ҳа” дейишди.

Имом яна жамоатга қаратса: “Яхши тайёргарлик кўрмаганга ўхшайсизлар” деди. Одамлар: “Ғусл қилдик, янги, покиза лиboslarни кийиб, атирларни сепиб келдик” дейишди. Имом жамоатга: “Булар ҳам керак. Аммо мен бошқа нарсани назарда тутгандим” деди. Жамоатдагилар ҳайрон бўлиб, “Нимани назарда тутгандингиз, домла?” дейишди. Шунда имом “Соябонларингиз қани?” деди.

Дуо қилаётган киши дуосининг ижобатига ишониб дуо қилиши керак. “Ижобат бўлармикин” деган нарсанинг кўнгилдан ўтиши ўша дуонинг ижобат бўлмаслигига сабаб бўлади. Ёмғир сўраб дуо қиладиган киши дуоси ижобат бўлиб, ёмғирнинг ёғишига ишониши, шунинг учун ўзи билан соябон олиши керак.

Абу Ҳурайра розияллоҳу анхудан ривоят қилинади:

Расууллоҳ соллаллоҳу алайҳи васаллам дедилар: “**Аллоҳга ижобатига аниқ ишонган ҳолда дуо қилинглар, билингларки, ғофил (тили талафғуз қилаётган нарсадан бошқа нарса билан) банд бўлган қалбдан Аллоҳ дуо қабул қилмайди**”.

Термизий ривояти.

Йирик муфассирлардан Абдураҳмон Саъдий раҳимаҳуллоҳнинг қизларидан бири шундай ҳикоя қилади: “Отам раҳматли масжиднинг томига чиқиб, тарновлардан бирини созлаётган эдилар. Йўлдан ўтувчилардан бири: “Эй Шайх, нега бундай қиляпсиз?” деб сўради. Шунда муфассир олим: “Эртага истисқо (ёмғир сўраш) намозини ўқиймиз!” дея жавоб бердилар”.

Субҳаналлоҳ! Аллоҳ таоло ҳақида яхши гумонда бўлиб, ўқийдиган намозининг натижаси гўзал бўлишига, ёмғир сўраб қиладиган дуосининг ижобат бўлишига чин қалбдан ишонган мусулмон ана шундай бўлади.

Биз ҳам дуо қилганимизда, қалбимизда ана шундай ишонч, ихлос бўлиши лозим. Иккиланиш, ихлос қилмай дуо қилиш дуонинг ижобат бўлмаслигига сабаб бўлади.

Аллоҳ таоло барчамизни ижобатига ишониб, ихлос билан дуо қиладиганлардан айласин!

Интернет маълумотлари асосида Нозимжон Ҳошимжон тайёрлади